

**Pemberian Durian Runtuh Untuk Hargai Pengorbanan Peneroka - Isa Samad Bernama
10 Mei, 2012**

PORT DICKSON, 10 Mei (Bernama) -- Pemberian 'durian runtuh' sebanyak RM15,000 bagi setiap keluarga peneroka Felda adalah bagi menghargai pengorbanan mereka memajukan tanah rancangan agensi itu.

Pengerusi Felda Tan Sri Mohd Isa Abdul Samad berkata kehidupan peneroka Felda dahulu sebenarnya dalam keadaan sukar semasa mereka mula meneroka tanah rancangan itu termasuk semasa harga kelapa sawit dan getah rendah.

"Masa itu susah tetapi mereka masih lagi bertahan. Cuba bayangkan semasa susah itu, semua peneroka ini lari meninggalkan Felda...Felda (mungkin) tidak akan ada.

"Oleh itu, menerusi penyenaiaan Felda Global Ventures Holdings (FGVH), kita memperoleh lebihan dan sebahagian kecil itu kita pulangkan semula kepada peneroka," katanya kepada pemberita pada majlis penyampaian baucar bayaran Bantuan Rakyat 1Malaysia (BR1M) peringkat daerah Port Dickson, pada Khamis.

Dua hari lepas, Perdana Menteri Datuk Seri Najib Tun Razak mengumumkan durian runtuh RM15,000 untuk setiap peneroka membabitkan lebih RM1.6 bilion serta beberapa insentif lain berikutan penyenaiaan FGVH di Bursa Malaysia, hujung bulan depan.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=665060>